

# *TATEGURU ABRAHAM*

 Bhuku raGenesi zvakare, chitsauko 22, kutanga nendima 15, uye tinotarisira zvino kungotaura kwechinguvana uye totanga shumiro. Genesi 22, kutanga nendima 15.

*Zvino mutumwa waJEHOVHA wakadana Abraham  
kubva kudenga rwechipiri,*

*Uye akati, Ndakapika neni ndimene, ndizvo  
zvinotaura JEHOVHA nokuda kwekuti waita chinhu ichi,  
ukasandinyima mwanakomana wako, mwanakomana  
wako mumwe chete:*

*Zvekuti mukuropafadza ndichakuropafadza, uye  
mukuwanza ndichawanza vana vako senyeredzi  
dzokudenga, uye semajechha ari pamahombekombe  
egungwa; uye vana vako vachatora masuo emuvengi  
wavo;*

*Uye muvana vako ndudzi dzose dzenyika  
dzicharopafadzwa; nokuti wakateerera izwi rangu.*

<sup>2</sup> Ivimbiso yakadini, nekuda kwekuteerera! Kuteerera ndiko kunodiwa naMwari. Zvakambonzi imwe nguva, “Kuteerera kunopfuura chibayiro.” Kuteerera Ishe kunopfuura chibayiro chipi hacho chaungagona kuita.

<sup>3</sup> Takatarisana zvino nechidzidzo chikuru, manheru ano, *Tateguru Abraham*, uyo ainzi “baba veKutenda,” nekuda kwekuti Mwari vakamuvimbisa kuti achava mudyi wenhaka yenyika, neMbeu yake. Uye kubudikidza naAbraham isu, zvatatafa muna Kristu, tinova Mbeu yaAbraham uye tiri vadyi venhaka pamwe chete naYe maringe nevimbiso.

<sup>4</sup> Zvino, Abraham aingova munhuwo zvake, asiri chimwe chinhu chinoshamisira. Mwari havana kumbobvira vakamudana, panhoroondo yese yatinayo, kusvika ava nemakore makumi manomwe nemashanu. Mudzimai wake, uyo aiva hanzvadzi yake ari mwana wababa nevamwe amai, aine makore makumi matanhatu nemashanu panguva iyoyo, zvichida vakanga vagara vese kubvira vachiri vadiki kwazvo. Zvino akanga asingabereki, uye asina vana. Mwari vakadanira kupatsanurwa kuzere, kuti azvipatsanure kubva kune imwe nyika yose, nekubva kuvanhu vake vose, uye nekubva kuhama dzake dzose. Paiva nechimwe chinhu chakatsaurwa chekuti aite.

<sup>5</sup> Uye kana Mwari vachikutarisira kuti uite chimwe chinhu chakatsaurwa, Vanotoda kupatsanurwa kwakazara kubva pane chero kupokana zvako. Unofanira kusvika pakuteerera kuzere, kuteerera zvaVanotaura. Mwari vanotozvida. Haugone kuzviita neimwe nzira. Uye, zvino, Vanogara vachiisa muenzaniso, uye

ndiwo waiva muenzaniso waVo, wekupatsanurwa kuzere kubva kumhuri yake yose, hama dzake dzose, nevamwe vakadaro, kufamba hupenyu hwakatsaurirwa kuna Mwari.

<sup>6</sup> Makore akapfuura, hapana chakaitika, asi zvakadaro Abrahama akaramba akabatirira. Haana kuodzwa mwoyo. “Haana kumbodzedzerekha pavimbiso dzaMwari kubudikidza nekusatenda, asi akanga akasimba, achipa rumbidzo kuna Mwari.”

<sup>7</sup> Gore negore, richipfuura, pasina kupokana vatsoropodzi vakawanda vaiuya vachiti, “Abrahama, baba vemarudzi, wava nevana vangani zvino?” Izvozvo hazvina kumudzedzeresa. Asina mwana, uye Sara akanga apfuura nguva yehupenyu, yekubereka vana, hongu, atopfuura zvakanyanya nguva yekuguma kubereka, asi zvakadaro Abrahama akatenda Mwari zvimwe chetezvo. Akaita gadziriro dzemwana, nekuti aiziva uye aive nekugutsikana kwakazara kwekuti Mwari havaigona kuita vimbiso yaVasina hukuru hwakakwana kuti vaitsigire.

<sup>8</sup> Mbeu yaVo inofanira kufunga zvimwe chetezvo. Zvisinei kuti zvinoita sezvisina chokwadi zvakadini, zvichiratidza kusajairika zvakadini kupfungwa yenyama, zvakangodaro Mwari havagone kuita vimbiso yaVasina hukuru hwakakwana kuti vashande nayo. Tinotenda chinhu chimwe chete ichocco nhasi. Mbeu yose yechokwadi yaAbrahama inotenda chinhu chimwe chetecho. Zvisinei nekuti mamiriro acho akaita sei atiri, ruzivo rwakawanda sei rwatakaunganidza, zvinhu zvingani zvakaitika, hazvijairike sei kupfungwa yenyama, kuti hupenzi hwakadii, waro, kupfungwa yenyama, hazviite kana mutsauko upi zvawo. Kana Mwari vakatura kudaro, ndizvozvo. Uye Mbeu yaAbrahama yakagadzikana pana ZVANZI NAJEHOVHA. Zvatopera.

<sup>9</sup> Tinoona, pamakore makumi maviri nemashanu akatevera, pasina vana. Uye zvakadaro Mwari vakanga vakatendeka kuchengeta vimbiso yaVo kuna Abrahama, nekuti Abrahama akatenda Mwari. Mukomana mudiki akauya panzvimbo, Isaka mudiki.

<sup>10</sup> Zvino mushure mekunge Isaka mudiki auya panzvimbo, zvino tinoona kuti Mwari vakamupa muedzo wakapetwa kaviri. Vakati, “Mwana uyu...” Mushure mekunge ava nemakore angangoita zana negumi nemashanu, kana kuti makumi maviri, Abrahama akanga ava. Vakati, “Ndinoda kuti utore uyu, mwanakomana wako mumwe chete, uende naye kugomo raNdichakuratidza, uye ikoko umupirise, pagomo iri, sechibayiro.” Nemamwe mashoko, oparadza humbowo hwose hwaiva nahwo hwekuti vimbiso yacho yaizozadziswa. Ndiko kubvisa zvinhu zvose zvepanyama.

<sup>11</sup> Abrahama ndokuti, "Ndakamugamuchira seuyo akabva kuvakafa. Uye ndine kugutsikana kwakazara kwekuti Vanokwanisa kumumutsa kubva kuvakafa."

<sup>12</sup> Ndivo vanhu zvino Mbeu yaAbrahama, nekuti Vakatimutsa kubva kuvakafa. Takanga takafa muzvivi nomukudarika. Uye iYe Akakwanisa kushandura pfungwa dzangu, kushandura mifungo yangu, kushandura hunhu hwangu, kundishandura zvese hazvo, Anokwanisa kuita sezvaAnoda. Chero zvaAnotaura, ndinotenda kuti iChokwadi, uye Mbeu yose yaAbrahama inotenda zvimwe chete.

<sup>13</sup> Abrahama, asiri mukusateerera Mwari, akatora mukomana muduku. Uye pamangwanani aya, akaudza varanda, "Imi sarai pano nemanyurusu. Uye mwanakomana nenii tichaenda mberi kunonamata, uye iye nenii tichadzoka." Oo, achazviita sei? Iye achitokwira pamusoro pegomo, kounouraya mwanakomana wake chaiye, asi iye anoti, "Mwana, mukomana nenii tichadzoka." Aiziva kuti chimwe chinhu chaifanira kuitika. Uye akanga asingazive kuti Mwari vachazozviita sei; iroro harisi basa rake. Anoziva kuti Mwari vakazvivimbisa.

<sup>14</sup> Ndizvo chete zvatine hanyn'a nazvo kuti tizive, Mwari vakazvivimbisa! Zvichafamba sei? Handikwanise kukuudzai. Asi Mwari vakataura kudaro! Vachatumira Jesu Kristu, kechipiri, Achauya muchimiro chenyama. Achatora avo vari vaKe pachaKe. Pachave nechiuru chemakore, kutonga mumireniyamu panyika ino, pamwe naYe, nevakadzikinurwa. Ndizvo zvaAkavimbisa, uye tiri kutarisira kuti nguva iyoyo isvike.

<sup>15</sup> Akavimbisa kuporesa vanorwara, kumutsa vakafa, kudzinga madhimoni. Akavimbisa kuzviita. Ndiye mumwe chete zuro, nhasi nekusingaperi. Sei? Handizive. Akavimbisa kuzviita! Tinozvitenda; ndizvozvo. Kana munhu achitenda Mwari, anotenda zvese ZvaVanotaura.

<sup>16</sup> Uye ndiyo nzira iyo Abrahama akatenda nayo Mwari. Zvino akakumbirwa kuparadza humbowo hwese hwekuti vimbiso yaKe yaizochengetedzwa, asi aive akagutsikana kuti Mwari vaigona kuzviita.

<sup>17</sup> Zvino, haVana kungopa vimbiso huru iyi chete, Vakaipa kuMbeu yake, zvakare. Uye nekuti Abrahama akanga akatendeka, uye akachengeta Sho—Shoko raMwari iro Mwari vakamuvimbisa, uye aiziva kuti Mwari vaigona kumutsa mwana uyu. Uye haana kunyima mwana wake chaiye; asi (Mwari) waive mufananidzo waMwari vachipa Mwanakomana waVo, hongu; paaitakura huni mugomo, nezvimwe zvakadaro; saKristu akazotakurawo mutanda wechipiriso chaKe pachaKe, achikwira pachikomo, apo paAkazorovererwa pamuchinjikwa.

<sup>18</sup> Tinocherechedza kuti mune izvi, mukuita izvi, zvakafadza Mwari chaizvo kuona kuti Abrahama aiVada kupfuura zvinhu

zvose zviri panyika, kunyange mwanakomana wake mumwe chete. AiVada kupfuura zvaigona kutaurwa nemunhu upi zvake, zvaigonekwa naani zvake, akanga achingoda Mwari zvakakwana kuti atende Shoko raVo.

<sup>19</sup> Mbeu yose yaAbrahama inotenda Mwari saizvozvo. Vari kutenda Mwari. Uye tinoziva kuti zvakafadza Mwari zvakanyanya zvekuti hezvino zvaVakataura, “Mbeu yako ichatora masuwo emuvengi wayo. Mbeu yako ichatora masuwo emuvengi wayo.” Rangarirai, iyoyo iZVANZI NAJEHOVHA. Mbeu yaAbrahama inozvitenda izvozvo. Kana uri Mbeu yechokwadi yaAbrahama, kutenda kwaiva naAbrahama muna Mwari, kuri mauri. Uye unotenda kuti zvakataurwa naMwari, Mwari vanochengeta vimbiso yaVo.

<sup>20</sup> Uye Vakazvitaura, zvino rangarirai, Vakangoita vimbiso iyi kuna Abrahama mushure mekunge Vamupa muyedzo. Mbeu yaAbrahama inofanira kutanga yaedzwa, kuona kana vachitenda Shoko zvechokwadi. Rangarirai, nzira chete yaaikwanisa kuchengeta vimbiso yaMwari, nokuti akatenda vimbiso yaMwari, uye akaedzwa kuti akaItenda here kana kuti kwete.

<sup>21</sup> Tinounzwa pakuyedzwa ikoko. Mbeu yaAbrahama, nhasi, inounzwa pakuyedzwa ikoko. Tichatora Shoko raMwari here, kana kuti tichatora zvakataurwa nevanhu pamusoro paRo? Tichatora here zvakagadzirwa nerimwe sangano sechitendwa, uye togamuchira izvozvo, kana kuti tinotora zvakataurwa naMwari? Kana Shoko raMwari riri rechokwadi, tinotenda Shoko raMwari, zvisinei nekuti chimwe chinhu chii. Tinorega shoko remunhu wese rive renhema, uye raMwari rive reChokwadi. Mbeu yechokwadi yaAbrahama! Asi usati wava Mbeu yechokwadi iyoyo, unofanira kupinda nemukuyedzwa, sezvakaita Abrahama, pachake. Havana kungovimbisa kuna Abrahama chete, asi Mbeu yake yaizotora masuwo evavengi. Oo, ini zvangu!

<sup>22</sup> Chimbofungai, tateguru uyu akanga akagutsikana zvizere mairi, mukuyedzwa kwake pavimbiso yeShoko raMwari, yaive iri yechokwadi. Zvisinei nekuti mamiriro ezvinhu aive akaita sei, akaramba achitenda kuti Shoko raive chokwadi. Abrahama uyu, tateguru mukuru, haana kumbozununguka mukutenda, paakaunzwa kunguva iyoyo yekuyedzwa. Akatenda kuti Mwari vaikwanisa kumumutsa kubva kuvakafa. Akazvitenda, nekuti Mwari ndivo vakaita vimbiso. Uye Mwari pavakaita vimbiso yekuti aizova “baba vemarudzi,” zvino akatenda kuti zvaive saizvozvo. Haana kuziva kuti zvaizovei. Mwana paakauya, mushure mekunge avimba, makore makumi maviri nemashanu, obva akumbirwa kuti aparatze mwana, akanga achiri kuziva kuti vimbiso yaMwari yaiva yechokwadi, zvino ndokupa mwanakomana wake.

<sup>23</sup> Mbeu yaKe, zvime chetezvo! Vimbiso yaMwari ndiyo chisimbiso, kune avo vari Mbeu yaAbrahama. Vimbiso chisimbiso, huchapupu hwakasainwa. Uye kana tikatenda Shoko rose rakavimbisa, ipapo chisimbiso chinobva chapihwa kwatiri, kusimbisa vimbiso nacho. Munoona, kana isu—kana isu, zvatiri Mbeu yaAbrahama, tinopinda nemukuyedzwa kuti tichatenda Bhaibheri here, kana kuti kwete. Bhaibheri iShoko raMwari, nekuti iRo ndiMwari. Uyezve mushure mekunge wapfuura nemumuyedzo, wekuti utende.

<sup>24</sup> Apo vamwe vavo vanoti, “Mazuva ezbishamiso akapfuura,” kana ukazvigamuchira izvozvo, zvinopesana neShoko.

<sup>25</sup> Kana ukati, “Haugamuchire Mweya Mutsvene, nhasi. Hakuna chinhu chakadaro. Vaapostora gumi nevaviri chete ndivo vakaUgamuchira.”

<sup>26</sup> Shoko rakati, Petro achiRiparidza paZuva rePentekosti, akati, “Tendeukai, mumwe nemumwe wenyu, uye mubhabhatidze muZita raje Kristu kuti mukanganwirwe zvivi, zvino muchagamuchira chipo cheMweya Mutsvene. Nekuti vimbiso iyi ndeyenu, nekuvana venyu, nekune avo vari kure, kunyangwe naavo vose vachazodanwa nalshe Mwari wedu.”

<sup>27</sup> Ndizvozvo chaizvo zvaZvinongoreva. Ndizvo, zvino kana wagadzirira kutora muedzo, muedzo wakaomararisa waMwari, uye wotevera iroro gwaro rachiremba remushonga, ndiri kukuudza, uchaona kuti Mwari vanochengeta Shoko raVo, kana ukaRitenda. Ndizvozvo chaizvo. Asi unofanira kupfuura nemazviri, nekuti ndicho chisimbiso; kana uchigona kuRigamuchira, zvino uchazogamuchira vimbiso. Nekuti, Igwaro raMwari remushonga, nzira yatinofanira kuzviita nayo, uye ndiyo nzira yatinofanira kuRitevera, izvo zvaVakataura. Zvino kwete kune vamwe bedzi, asi “ani naani,” ani naami anotenda, ani naani anotendeuka, ani naani anotenda. Ndere kuzvizvarwa zvose, kuvanhу vose, ani naani anoda kuRitenda. Uye kutenda muShoko raMwari kunokuunza kuvimbiso iyi. Zvadaro, zvino ipapo bedzi, ndipo paunogona kuva nesimba rekutora chisimbiso chevimbiso.

<sup>28</sup> Uye vimbiso yatinogamuchira, chisimbiso, ndirwo rubhabhatidzo rweMweya Mutsvene. Ndizvozvo chaizvo. Nokuti ndiMwari vari muchimiro cheMweya, iwe uri Shoko raVo mauri, Vanobva vapinda mukati. Kana ukagamuchira Shoko mauri, Mweya Mutsvene ndicho chinhu chega chinogona kuita kuti iRo rirarame, zvino ipapo une vimbiso yekutora suwo remuvengi wese anoledza kukurwisa. Ndizvozvo chaizvo. Mwari vakazvivimbisa, uye ndizvozvo.

<sup>29</sup> Zvino, rangarirai, unogona kuzviita bedzi ipapo, uye ipapo bedzi, mushure mekunge wayedzwa neShoko.

<sup>30</sup> Abrahama akayedzwa neShoko. “Uchatenda here, Abrahama, kuti uchava nemwanakomana?”

“Hongu.”

<sup>31</sup> Mwanakomana akauya. “Zvino muparadze. Uchiri kuzvitenda here, Abrahama?”

<sup>32</sup> “Ndinozvitenda, zvakadaro, nokuti Munokwanisa kumumutsa kubva kuvakafa.”

<sup>33</sup> Uye mushure maizvozvo, Vakati, “Zvino, Mbeu yako ichatora suwo remuvengi wayo.” Amen! Mushure mekuuya kwemuyedzo!

<sup>34</sup> Ngatitarisei pane dzimwe dzembeu dzaAbrahama, mumbeu dzepanyama. Izvo, isu nhasi tiri Mbeu yepamweya. Asi ngationei, nembeu yepanyama, yevamwe avo vakatenda vimbiso izere yaMwari, uye vakasambobvu-...[Chibenga chisina chinhu patepi—Mupepeti]

<sup>35</sup> Ndi kati, “Gara zviya, musikana Mukristu angadirei kuratidza hanzu yake yemukati? Handigone kuzvinzwisia izvozvo.”

<sup>36</sup> Wakazvarwa patsva, naMwari, une runako rweMweya Mutsvene kuratidza kuti izvo zvauri, ndizvo zvauri. Iwe une hunhu uhwo masiketi akatsemuka aya haana. Ndizvozvo chaizvo. Mudzimai chaiye waMwari, anomira nehunhu, unogona kusekwa, nekunzi wechinyakare; asi une chimwe chinhu chavasingagone kubata, uye vakatochirasa uye havachambofa vakakwanisa kuva nacho zvakare. Ndizvozvo chaizvo. Une hunhu. Ndi hwo hunotsvakwa naMwari, hunhu. Maona?

<sup>37</sup> Asi chinhu chekutanga, kana paine mubvunzo mupfungwa dzako, usatombochiite zvachose. Usauye mumutsara wekunamatirwa kana paine mubvunzo mupfungwa dzako. Usauye kunze kwekunge uchinyatsozvitenda, zvirokwazvo, pasina kana saisai zvaro mupfungwa dzako, zvachose, kunze kwekuti uchapodzwa chete, zvino uchabva papuratifomu ino uri munhu apora. Ndizvozvo, kana pasina mubvunzo mupfungwa dzako, zvachose. Unofanira kutenda Mwari, kwete kungotenda kwekabanga. Tenda zvemazvirokwazvo!

<sup>38</sup> Uye Mbeu yaAbrahama inozvitenda nekuti Shoko rakataura kudaro, uye ndicho chikonzero tichizvitenda. Kwete nekuti mumwe munhu atsoropodza, nekuti mumwe munhu akataura kudaro. Nekuti Mwari vakataura kudaro, ndizvo zvinoita kuti chive Chokwadi. Kana Mwari vazvitalura, zvinopedza mibvunzo yes. Ndivo shoko rekupedzisira. Ndivo mhedziso. Kana Mwari vataura chero chinhu, zvatopera. Hapana chimwezve chinogona kutaura zvinopesana naZvo. “Shoko remunhu wese ngarive nhema, uye raNgu rive reChokwadi.”

<sup>39</sup> Zvino tichitarisa dzimwe dzembeu idzi, ngatifungei. Tinofunga nezvezvana vechiHebheru, vandinavo pano, ndichifunga nezvazvo, pamusoro pevana vechiHebheru, mushure mekunge vayedzwa vachipesana nekunamata

chifananidzo. Zvino, rangerirai, mambo akati, "Ani naani asingapfugamire chifananidzo ichi, achakandirwa muvira remoto." Zvino, vana ava vaitenda kuti Shoko raMwari raive rechokwadi, kuti vaisafanira kunamata chero mhando ipi zvayo yechifananidzo, asi pavakauya kumangange uye vakayedzwa kuti vaizodaro here.

<sup>40</sup> Apo, vamwe vana vose zasi uko vakagamuchira ndokuenda kunonamata, vakafambira mberi chaiko nenzira yakataurwa namambo. Vakaenda nepfungwa yakakurumbira yezuva iroro, yekuti vanofanira kuzviita.

<sup>41</sup> Zvino pavakayedzwa, kana vaizonamata zvifananidzo uye votyora Shoko raMwari, vakaramba vakatendeka kuShoko. Zvisinei nemamiriro ezvinhu, vakaramba vakatendeka kuShoko. Uye pavakavakandira muvira romoto, vimbiso yaMwari yakazadziswa. Vakatora masuwo emuvengi wavo. Zvino pakava neMurume wechina akanga amire imomo, aine kiyi yaikiyinura kupisa kuchibva mumoto, uye hauna kuita chimwe chinhu kunze kwekuvasunungura. Ameni.

<sup>42</sup> Apo murume kana mukadzi agadzirira kutora muyedzo, muyedzo wakaomararisa!

<sup>43</sup> Munona, vakatozopinda mumoto. Zvino pavakadaro, vakange vave mumoto, uye chinhu choga chakaitika, muyedzo wemoto uyu wakangokiyinura chete, wakabvisa zvi—zvisungo kubva pamaoko avo.

<sup>44</sup> Nguva zhinji, Mwari vanotirega, kana tanyatsosungwa neniyika, takasungwa, Vanorega miyedzo inopisa ichiuya patiri, apo patinozofanira kuita sarudzo. Uye patinoita izvozvo, chinhu chega chinogona kuitwa nemuyedzo, kana Mbeu chaiyo yaAbrahama yakamira pa—pamharadzano dzesarudzo, uye oita sarudzo yake yekushumira Mwari, unogona chete kudambura misungo uye wotisunungura. Satani anogona kukupa chirwere. Anogona kukupa chimwe chinhu, nechimwewo. Unoziva sei kuti havasi Mwari vakuisa pamharadzano dzenzira, kuona kuti imhandoi yesa—sa—sarudzo yauchaita?

<sup>45</sup> Vakatora suwo remoto. Moto hauna kugona kuvapisa. Pakanga pasina kana munhuwi wemoto pavari, nekuti vaiziva kuti vaiva Mbeu yaAbrahama, uye vakamira naMwari pamwe neShoko raVo. Vakatora ma—masuwo emuvengi, uye moto hauna kugona kuvapisa, nekuti vakatora masuwo.

<sup>46</sup> Gare-gare, pakava nemumwe murume, muporofita zasi ikoko, zita rake ainzi Dhanieri. Aizo...akava nemuyedzo wekuti aizoshumira Mwari mumwe chete wechokwadi here, kana kuti kwete. Zvino pazvakasvika panguva iyoyo, kuti aizoshumira here Mwari mumwe chete wechokwadi, kana kunamata mwari wechihedheni, iye akaramba kuzviita; uye akavhura zvidzitiro zvepamahwindo, ndokunamata kuna Mwari wake, zuva nezuva. Uye akabatwa nekuda kwazvo, nechitarafu

chemutemo wenyika, ndokukandirwa mugomba reshumba. Boka reshumba dzine nzara dzakamudzvovera. Chii chaakaita? Akatora suwo remuvengi wake. Shumba hadzina kugona kumudya. Mwari vakatumira Shongwe yeMoto, Mutumwa akamira pakati pake neshumba.

<sup>47</sup> Akatora suwo remuvengi, nekuti akayedzwa kuti aone kana aizonamata Mwari mumwe wechokwadi, kana kuva navanamwari gumi neavaviri vechihedheni vaainamata. Saka akakunda moyedzo, uye akatora suwo remuvengi. Shumba haina kana kukwanisa kumubata, nekuti Mwari vakange vainaye. Vimbiso yaMwari yakaramba iri yechokwadi, nekuti aive Mbeu yechokwadi yaAbrahama.

<sup>48</sup> Mosesi, oo, mumwe mukuru. Akayedzwawo, zvakare, kuti aone vimbiso yaakapihwa naMwari. "Ndichava newe paunoenda zasi ikoko." Zvino paakamira pamberi pevatevedzeri vechipo chake, Jane naJambure vakaedza kusimuka uye vachitevedzera zvese zvainge zvarairwa Mosesi kuti aite. Uye Mwari vakanga vamudana, uye aiziva kuti ndiye akanga atumwa kuita izvozvo, zvino akamira ipapo ndokuita chishamiso sezvaakaudzwa naMwari kuti achite. Zvino hepano pakamira vatevedzeri, kuti vaite zvime chetezvo, asi hazvina kunetsa Mosesi. Akamira akatendeka kuShoko raMwari, zvino akatora masuwo, ameni, emuvengi, nekuti akamira akatendeka kuvimbiso yaMwari, zvisinei nekuti ndiani aiedza kuitevedzera.

<sup>49</sup> Chidzidzo chakadini kuMukristu wose! Ukatarisatarisa uye woona munyengeri, iwe chingorangarira kuti ari kuedza kutevedzera chinhu chaicho chechokwadi. Asi, zvinongoreva kuti kune mumwe chete bedzi ari wechokwadi. Mira wakatendeka kuShoko raMwari! Zvisinei nekuti chii chinouya kana kuenda, chengeta vimbiso yaVo. Hongu, Dhanieri akaramba akatendeka kuShoko raMwari.

<sup>50</sup> Zvisinei nekuti vangani vakaedza kumutevedzera, nezvime zvose, akaramba akatendeka. Uye akauyira chinangwa, kuti abudise Israeri kubva muEgipita, nekuvapinza munyika yechipikirwa. Zvino payakasvika nguva yekuti vapinde munyika yechipikirwa, vabva muEgipita, hapo pakamira Gungwa Rakafa munzira. Uye akatora masuwo emvura, zvino masuwo ndiwo bhenen'ene kuzaruka. Uye mvu—mvura dzikadzokera shure, Mosesi ndokutora Israeri kupinda murenje, kugomo uko Mwari vakamuraira kuti avaunze. Ameni. Akatora masuwo emuvengi.

<sup>51</sup> Baba vake, Abrahama, vakanga vaine vimbiso iyoyo, yekuti Mbeu yavo yechokwadi yaizotora suwo remuvengi. Zvino masuwo emvura akanga akavharwa, uye akatadza kupinda nepo, uye ndiyo yaive nzira yebasa. Aifanira kuunza vana ivavo kugomo iroro. Mwari vakamuudza kuti adaro. Zvino hapo ndokumira suwo munzira, zvino akatora suwo remuvengi.

<sup>52</sup> Joshua, gare-gare, pavakasvika paKadheshi-bhanea, yakanga iri chigaro chekutonga chenyika panguva iyoyo, ipapo Israeri yakasangana nekutongwa kwayo. Tinowana Joshua aina Karebhi, nevamwe gumi nevaviri...kana—kana vamwe gumi. Mumwe chete kubva mune rudzi rwoga-rwoga akatumwa kunotsora nyika yavakanga vagadzirira kugamuchira.

<sup>53</sup> Uye pavakaona hofori dziya huru dzakamira ikoko, gumi vavo vakabatikana kwazvo, vakati, “Hatigone kuitora. Zvingatiremera. Nhai, tarisai kupikisa kwatinako.” Asi pavakadzoka kuzopa shoko, vakauya neshoko rakaipa.

<sup>54</sup> Vaizounzireiko shoko rakaipa, kana Mwari vakavaudza kuti, “Ndakakupai nyika iyoyo; ndeyenyu”? Vakavaudza zasi kuEgipita, “Ndakakupai nyika iyoyo, inyika yakanaka, inoyerera nemukaka nehuchi.”

<sup>55</sup> Asi pavakaona kupikisa kwakakura kwazvo, gumi vavo vakadzoka ndokuti, “Hatikwanise kuzviita.”

<sup>56</sup> NdiJoshua, akanyaradza vanhu, ndokuti, “Tinokwanisa nekupfuirira kuitora. Tinokwanisa nekupfuirira!” Chikonzero nei? Akanga akatarisa kuvimbiso. Aive Mbeu yechokwadi yaAbrahama. Zvisinei nekuti kupikisa kwaivei, “Tinokwanisa kutora suwo, nekuti Mwari vakavimbisa nyika yacho.” Saka iye akatora suwo.

<sup>57</sup> Pamberi apo, paakaunza vana veIsraeri zasi kurwizi. Hapo rakamira, mumwedzi waKubvumbi, rwizi rwukuru, rwakazara. Jorodhani rwuchiyerera kubva mumakomo, uye rwakanga rwakafashamira nemumapani. Zvaitaridzika senguva yakaipisia, yegore, yekunge ari ipapo. Asi, zvakadaro, aive ari Mbeu yaAbrahama. Aiziva kuti akanga aine vimbiso, uye akanga ari mumutsara webasa racho. Mwari vakamupa chiratidzo, maitirwo azvo, uye ndokutora masuwo erwizi. Masuwo paakati bhenen’ene kuzaruka, mvura yakadzokera chaiko kumusoro mumakomo. Zvino Joshua naIsraeri vakatora masuwo emuvengi, ndokuyambuka vachipinda munyika yechipikirwa, nekuti Mwari vakavaudza kuti vazviite. Mbeu Yechokwadi yaAbrahama!

<sup>58</sup> Hama nehanzvadzi, paakasvika mhiri ikoko, Jeriko rakanga rakakombwa namasvingo, akapamhama zvekuti vaigona kumhanyisa ngoro nhatu napamusoro pawo. Ko vaIsraeri ava vaizozviita sei neminondo yekukwereta, yakanhongwa, nezvimwe zvese, nezvimiti nematombo, ko vaizomupinda sei imomo? Asi akanga achiri Mbeu yaAbrahama. Mwari vakamupa chiratidzo, vakamuudza maitirwo azvo, vakati, “Ridza hwamanda.” Ameni. Ndizvozvo. “Danidzirai, forai muchikwidza kune masvingo, masuwo achawira pasi pamberi penyu.” Amen! Aive Mbeu yehumambo yaAbrahama. Akanga ari mutendi chaiye waMwari. “Masuwo achadonha pamberi pako. Ingodanidzira, uye worldza hwamanda. Ndizvo zvoga

zvaunofanira kuita." Zvino chii chakaitika? Masuwo akawira pasi, Joshua ndokutora guta.

<sup>59</sup> Kwapera chinguva zvishoma, tinoona kuti muvengi akanga achipararira kwese-kwese achienderera mberi, shure kwaizvozvo, uye Vakatomisa zuva munzira dzaro. Sezvandakataura mamwe mangwanani, nezve*Nenji*, Vakamisa zuva kusvikira atora masuwo emuvengi wake. Ameni. Akaziva kuti kana muvengi iyeye akaungana zvakare, vaive vakapararira, uye zuva rakanga rave kunonyura, zvino vaAmori, nevaAmareki, nevamwe vakadaro, vakanga vakapararira kwese-kwese. Kana vakazombosangana zvakare, uye vouya pamwe chete, zvino aizova nenguva yakaoma yekuvaita kuti vaparadzanezve. Uye paive nechinhu chimwe chete chainge chakabata, yaiva nguva. Zvino Vakamisa nguva. Ameni! Ameni! Pane chinhu chimwe chete chirri kumudzivisa kuvimbiso, raiva zuva, chisikwa pachezvacho chichiyambukira mhiri, iVo ndokumisa chisikwa. Sei? Akanga ari Mbeu yaAbrahama. Akatenda vimbiso yaMwari. Vakarimisa, uye ndokutora masuwo. Hongu, changamire.

<sup>60</sup> Varume vakuru ava, vese zvavo vanhu vakuru. Asi munoziva apo ivo, mumwe nemumwe wavo, pavakasvika pasuwo rerufu, vose vakafa. Mumwe nomumwe wavo aitofanira kufa. Nekuti vaive varume vakuru, "Vakamisa mi-miromo yeshumba, vakapukunya moto, nekunocheka kwemunondo," nezvimwe zvakadaro, sezvatinoudzwa muna vaHebheru 11. Uye vakatora masuwo emuvengi, vose kunze kwemuvengi mumwe chete, zvino rwaiva rufu. Rufu rwakavamedza vose zvavo.

<sup>61</sup> Zvino rimwe zuva, kwakazouya Mbeu yeHumambo yaAbrahama, Jesu Kristu, Mwanakomana waMwari; Mbeu yaAbrahama, nekutenda. Kwete kubudikidza naIsaka, mbeu yepanyama; vakaita chikamu chavo. Asi apa pakauya Mumwe Akanga asina kuzvarwa nenzira yemazuva ese. Apa pakauya Mumwe asina kumbounzwa nechishwu chebonde. Apa pakauya Mumwe akazvarwa nemhandara. Mwanakomana waMwari, Mbeu yaAbrahama, aiva Munhu mukuru zvakadii uyu! Vamwe vese vepanyama vakazvarwa nemazvarirwo emazuva ese. Murume uyu akaberekwa nekuzvarwa nemhandara. Chii chaAkaita paAkauya panyika? Akakunda muvengi wese aiva naSatani. Akakunda zvose.

<sup>62</sup> Chii chaAkaita? Akaenda uye Akakunda hurwere. Hapaigona kuva nehirwore munharaunda dzaKe; chero kupi kwaiva nehirwore, Akahukunda. Chii chaAkaita mushure mekunge Ahukunda? Akatipa makiyi, ameni, achiti, "Chose chamunosunga panyika, Ndichachisunga Kudenga." Oo! Ameni! Ndiyo Mbeu yeHumambo yaAbrahama, vimbiso yaKe. Mweya Mutsvene ari matiri zvino, ane makiyi, akaabata kune hurwere. Akakunda hurwere. Hurwere haugone kumira muHupo hwaKe. Uye Akati Akatipa makiyi ekuita chinhu chimwe chete, kukunda

hurwere. "Chero chipi chamunosunga panyika, Ndichachisunga Kudenga."

<sup>63</sup> Zvakare, muyedzo, Akayedzwa nenzira dzese sezvatakaitwa. Chii chaAkaita? Akaukunda. Uye Akati kudii kwatiri? "Dzivisai dhiyabhore, uye iye achatiza kubva kwamuri." Akatikundira hurwere. Akatikundira muyedzo, akaputsira pasi masuwo; ndokutora kiyi kubva kumuyedzi, ndokuitambidza kumutendi, ari Mbeu yaAbrahama, ndokuti, "Kana akakuyedza, mudzivise, uye iye achakutiza." Oo, ini zvangu! Mudzivise!

<sup>64</sup> Akakunda zvose rufu negehena. Akamuka nezuva retatu, achiti, "Ndakunda. Uye nekuti Ndinorarama, nemivo munorarama." Oo, ivimbiso yakadini! Ndeye kuMbeu yaAbrahama. Akakunda guva, akamuka nezuva retatu, kuti tiruramiswe. PaAkamuka, Aive kururamiswa kwedu. Izvozvo zvinotiita kuti tivei? Akakunda hurwere. Akakunda rufu. Akakunda gehena. Akakunda guva. Akakunda muyedzo. Oo!

<sup>65</sup> "Zvino tiri vakundi nokupfuurisa kubudikidza naiYe wakatida, uye akatipira hupenyu hwaKe," ari Mbeu yeHumambo yaAbrahama. NeMweya mumwe chete waMwari matiri, wakanga uri maAri, tiri vakundi nekupfuurisa. Suwo rose zvaro rakakundirwa isu. Chinhu chimwe choga chatinofanira kuita kuritora. Rakatokundwa kare. Hurwere hwakakundwa. Rufu rwakakundwa. Gehena rakakundwa. Guva rakakundwa. Zvinhu zvose zvakakundwa, uye takabata makiyi, nenyasha dzaKe. Unotya kuapinza muburi rekiyi here, woti, "Ndinouya muZita raJesu Kristu"? "Kumbirai Baba chero chinhu muZita raNgu." NdinoMuda.

<sup>66</sup> Mushure mokunge zviuru zviviri zvemakore zvapfuura, zviuru zviviri zvemakore, uye nazvino heunoi Ari pano pakati pedu, Mukundi ane masimba akabvarura chidzitiro nepakati, uyo akaisa hurwere hwose, hosha dzose, zvose paAri, uye akatakura hutera hwedu kumuchinjikwa, uye nezvirwre zvedu nehosha dzedu, ndokuzvikunda, uye ndokumuka kuvakafa kuti tiruramiswe, uye amire ari mupenyu mushure mezviuru zviviri zvemakore, kuti aZviratidze saJesu Kristu mupenyu, pakati peMbeu yeHumambo yaAbrahama, avo vadyi venhaka yezvinhu zvose. Oo, ini zvangu! Avo vanozotevera, vanopfuura nemukuyedzwa, vimbiso yeShoko! Kana uchigona kutenda Shoko, zvadaro uri Mbeu yaAbrahama zvakare. Ndiwo mauiro aunoita kwaRiri.

<sup>67</sup> Kana usingakwanise kutora kuyedzwa ikoko neShoko, zvino kana ukaRipokana, kuRifungira zvishoma, haukwanisi zvachose kuRitenda, pane chimwe chinhu kana chimwewo, haukwanise kuRitenda, zvadaro usause mumutsara wekunamatirwa. Handaizombotambira pedyo neartari, kusvikira wawana nyasha dzakakwana dzekuziva kuti Shoko raMwari nderechokwadi.

<sup>68</sup> Uye kana iwe wazopamura chidzitiro ichocho chekusatenda, zvino wava nemakiyi mumaoko aka, erufu, gehena, neguva, nokuti une Mukundi Akakukundira. Zvino une vaHebheru 13:8, inotiuza kuti, “Jesu Kristu ndiyemumwe chete zuro, nhasi, nekusingaperi.” Ko tingaziita sei?

<sup>69</sup> Vanhu nhasi vanoti, “Oo, manje, ndinokuudzai, Ari nei-imwe nzira, Ari.”

“Ndiyemumwe chete,” Bhaibheri rakadaro.

“Oo, asika, haAchaita nhasi uno sezvaAisiita.”

<sup>70</sup> Tinozviona iko zvino, patinoona Shoko raKe richisimbisa. Chii chazvinoita? RinoŽvikandira pavari chaipo zvakare. Ameni.

<sup>71</sup> Mbeu chaiyo yaAbrahama inoRitenda. VanoRiziva. Zvino Akamira, manheru ano, sezvaAkasangana naAbrahama kumusoro uko mumazuva aRoti ndokuita chishamiso chiya, sezvaAkaita achiudza Sara zvaakataura kumashure kwaKe. Jesu akavimbisa, Mbeu yeHumambo yaAbrahama, kuti Chechi yaizoona chinhu chimwe chetecho Kuuya kwaKe kwave kuda kusvika. Chii ichocho? Zvinofanira kuitika. Mwari vakazvivimbisa. Jesu Kristu akazvisimbisa uye akati zvichava saizvozvo, zvino hepanoi patiri nhasi, mushure memakore zviuru zviviri, Muonei pakati pedu, achiri Mukundi ane masimba! Akakunda rufu, gehena, guva, zviyera-tera zvose; akatora Shoko . . . . . iye. Hongu.

<sup>72</sup> Akati, “Kana mukagara maNdri, neMashoko aNgu ari mamuri, kumbirai chamunoda uye muchachipihwa.” Chaiva chii? Shoko, Kristu, Ari mumoyo mako. “Kana mukagara maNdri, Mashoko aNgu achigara mamuri, zvino makunda zvose nekuti Ndakazvikundira imi. Kana mukagara maNdri, kana mukakwanisa kuNdinzwisia, kana mukakwanisa kugara maNdri. Uyo anoNditenda, anoNdigamuchira; kwete kungotenda kwekunyepedzera, asi anogona kugamuchira. Uyo anonzwa Mashoko aNgu, anonzwisia Mashoko aNgu, uye achitenda kuna iYe akaNditura, ane Hupenyu husingaperi; uye haangapindi mukuyedzwa, kana mukupomerwa, asi abva murufu achipinda muHupenyu.” Hepanoi paAri, Mukundi ane masimba!

<sup>73</sup> Hepano paAri nhasi uno, mumwe chete zuro, nhasi, nekusingaperi. Hepano Achiita mabasa pamberi peMbeu yaAbrahama, yakadanwa kubva muBhabhironi, yakadanwa kubva muSodhoma, yakadanwa kubva munyika, uye yakapatsanurwa, ichiratidza vimbiso yaKe ingori zvimwe chetezvo. Mushure mezviuru zviviri zvemakore, hepano Amire pakati pedu, manheru ano, Mukundi uya ane masimba, Shoko raMwari iRo rinokwanisa kunzvera pfungwa dziri mumwoyo, nevaravaro dzacho. Chii ichocho? “Mbeu yako ichatora masuwo emuvengi wayo.” Chii ichocho? IMbeu yaAbrahama, Mbeu

yeHumambo, ichitenda Shoko. Uye Shoko ndiro—Shoko ndiro Mwari.

<sup>74</sup> Zvino kana tichiona izvi, tinogona kudanidzira pamwe chete navo, sanyanduri wekare:

Kurarama, Akandida; kufa, Akandiponesa;  
Kuvigwa, Akatakurira zvivi zvangu kure-kure;  
Kumuka, Akaruramisa pachena  
nokusingaperi:  
Rimwe zuva Ari kuuya—oo, zuva rinobwinya!

<sup>75</sup> Mumwe akati, “Uri kuchembera, chikomana.” Handina zvandingakwanisa kuita nezvazvo.

<sup>76</sup> Ndakararama kubva ndichiri mukomana mudiki, budiriro yangu yega yandati ndamboita ndeyekuona Kuuya kwaJesu Kristu. Ndakapira hupenyu hwangu nechinangwa ichocho. Ndichiri papurupiti, semutana, ndinotenda Nyaya imwe cheteyo, uye chinhu chikurusa chandingafunga nezvachyo kuona Jesu Kristu achiuya kubva kumatenga kuzogamuchira vaKe pachaKe. Mwari, zvino wangu... Ndosaka tichigona kuimba:

Chingamidzai mose simba reZita raJesu!  
Regai Ngirozi dziwire pasi dzichizvambarara;  
Unzai pano korona yehumambo,  
Uye timuMugadze korona yaIshe wavose.

<sup>77</sup> Sei? Ndiye Mukundi ane masimba. Kana uri maAri, uri muShoko. Akati, “Kana muchigara maNdiri, kumbirai zvamunoda.” “Zvamunoda,” nokuti suwo rose rakatokundwa kare. Zvino tinogona kuti:

Nekuti vimbiso yose iri muBhuku ndeyangu,  
Chitsauko chesse, ndima yose, uye nemutsara.  
Ndiri kuvimba muShoko raKe Mwari,  
Nekuti vimbiso yese iri muBhuku ndeyangu.

<sup>78</sup> Shamwari, munocherechedza here zvazvinoreva? Vimbiso yose yakaitwa naMwari kuna Abrahama, vimbiso yose yakataurwa nevaporofita, vimbiso yose iyo Jesu Kristu vakavimbisa yezuva rino, Ari pano kuzoisimbisa uye nokuratidza kuti Anorarama nekusingaperi. “Mbeu yako ichatora suwo revavengi.”

<sup>79</sup> Kana zvasvika panguva yekufa. Unoti, “Ko izvo?” Uchiri neChinhu chiye chakataurwa naPauro. “O guva, kukunda kwako kuripi? O rufu, rumborera rwako rwuripi? Asi Mwari ngavavongwe, Vanotipa kukunda kubudikidza neMukundi uya ane masimba, Jesu Kristu.” Oo!

Regai Ngirozi dziwe pasi dzichizvambarara;  
Unzai pano korona yehumambo,  
Uye timuMugadze korona yaIshe wavose.

<sup>80</sup> Manheru ano, mushure mezviuru zviviri zvemakore, takamira kuti tiMuone, nazvino, Mukundi ane masimba Iye

akabvarura chidzitiro chaitipatsanura kubva kune chero chipikirwa chaMwari, uye isu tiri vakundi nekupfuirisa maAri. Ngatinamatei.

<sup>81</sup> Baba voKudenga, takamira pano, manheru ano, muHupo hweMweya Mutsvene, Munhu mukuru uya waJesu Kristu ari muchimiro cheMweya, Akavimbiswa kuuya paMbeu yaAbrahama, Mbeu yeHumambo, tinonamata, O Mwari, kana paine murume kana mudzimai, mukomana kana musikana, muno, asingaKuzivei, vane kupokana nekugangaidzwa mupfungwa dzavo, pamusoro peShoko raMwari, kuti iRo iChokwadi here kana kuti kwete, O Mwari Vakuru, Vakaita vimbiso, huyai manheru ano! Pane vimbiso imwe huru yaMakaita, Ishe, Munogona kuchengeta vimbiso iyoyo, Makati, “Uyo anotenda maNdiri, mabasa aNdinoita iye achaaitawo; makuru kune aya achaaita, nekuti Ndinoenda kuna Baba.” Mwari Baba, tinonamata kuti Musimbise Shoko reNyu.

<sup>82</sup> Pane vazhinji vevana vaAbrahama pano manheru ano, vari kurwara. Oo, dhiyabhore akavavarira; vakavaisa mukati, ndokukiya suwo, vakati, “Zvino munofanira kufa; une dambudzikio remoyo. Une *ichi, icho*, kana *chimwewo*, zvino unofanira kufa.”

<sup>83</sup> O Mwari, dai hwamanda yejubheri yarira, manheru ano, yeEvhangeri, kuti nhapwa yose iyende yasunungurwa! Jesu Kristu akakunda masuwo iwayo. Takabata makiyi mumaoko edu. Oo! “MuZita raNgu vachadzinga madhimoni. Kana ukakumbira Baba chero chinhu muZita raNgu, Ndichachiita. Uyo anotenda maNdiri, mabasa aNdinoita naiye achaaitawo. Shoko raMwari rakapinza uye rine simba kupfuura munondo unochecka nemativi maviri, uchicheka zvokupatsanura uye nemwongo, uye kunyange munzveri wemifungo iri mumoyo.”

<sup>84</sup> “Uye sezvazvakanga zviri mumazuva aNoa, ndizvo zvazvichava pakuya kweMwanakomana wemunhu, nekuti vaidya, vachinwa, vachiwanana, vachiwaniswa; zvirongwa zvikuru zvekuvaka.” Uye isu tinotarisa nyika, “Kuchava nezviratidzo, miono inotyisa kudenga kumusoro (izvi zviedza zvinobhururuka), kudengendeka kwenyika munzvimbo dzakasiyana-siyana, gungwa richitinhira (mafungu emvura), mwoyo wemunhu uchikundika (kutya), kushushikana pakati pendudzi, kuvhiringika kwenguva.”

<sup>85</sup> “Uye sezvazvaiva mumazuva aRoti, ndizvo zvazvichava pakuya kweMwanakomana wemunhu.” O Mwari, huyai manheru ano muite Shoko reNyu, huyai manheru ano muzoremekedza kutenda kwevana vaAbrahama. Kubudikidza neZita raJesu Kristu tinozvikumbira. Ameni.

<sup>86</sup> Ishe vakuropafadzei, zvikuru. Ini handisi kuzodanira kuartari panguva ino. Ndiri kuzvisiira kwamuri. Ndinofunga kuti, kazhinji, kudanira kuartari...Ndinotenda pamwe navo.

"Asi kune vose vakagamuchira, vakabhabhatidzwa." Ndizvozvo,  
"Kune vose vakaMugamuchira." Tichanamatira vanorwara.

<sup>87</sup> Ndaigona kutaura pano husiku hwose. Muri ungano yakanakisa. Asi zvandinotaura zvinongova munhu; asi kana ndikataura Mashoko aVo, zvadaro anenge achisiri mashoko angu, Mashoko aVo. Kana ndikataura chimwe chinhu, uye Mwari vakasachitsigira, ipapo ranga ringori shoko rangu. Kana ndikataura Shoko raVo, uye iVo voRitsigira, ndiani uyo murume kana mukadzi, mukomana kana musikana mutadzi, anozofamba achienda uye oti haZvina kudaro?

<sup>88</sup> Jesu, akati paAkaita zvinhu izvi, vakati, "Murume uyu muuki. Idhimoni!" Muuki, chero munhu upi hake anoziva kuti kuuka ndekwadhiyabhere. Akati, "Uyu muuki." Asi makamboona here muuki achiparidza Evhangeri? Makamboona here muuki achidzinga madhimoni? Kwete, zvirokwazvo, havazvii.

<sup>89</sup> Akati, "Zvino, ini Mwanakomana wemunhu ndichakuregererai pachinhu ichi. Asi kana Mweya Mutsvene wauya, kuzotaura zvinopesana naWo hazvizomboregererwi munyika ino kana munyika inouya, nekuti kudana basa raMwari kuti mweya wetsvina."

<sup>90</sup> Mwari vatinzwire tsitsi, manheru ano, uye ndinonamata kuti Mwari vaburuke uye vasimbise Shoko iri pamberi penyu.

<sup>91</sup> Hama, hanzvadzi, uyu mweya wangu. Ndinofanira kuzosangana naMwari. Ndine mungava pane zvandinotaura kwamuri. Mwari vachandiita kuti ndizozvidairira. Ndizvozvo. Zvingandibatsirei kuti ndimire pano ndichitaura zvinhu izvi kana ndaiziva kuti ndainge ndichipomera mweya wangu kugehena?

<sup>92</sup> "Pane nzira inoita seyakanaka kumunhu, asi magumo ayo inzira dzerufu." Mwari havadi mududziri. Sezvandakambotaura, Vanodudzira Shoko raVo pachaVo.

<sup>93</sup> "Mbeu yaAbrahama ichatora suwo remuvengi." Munozvitenda here?

<sup>94</sup> Dai ndaigona kukupodzai, ndaizviita. Kristu akatokupodzai kare. Chinhu choga, une kiyi muruoko rwako. Kiyi iyoyo ndiko kutenda kwako, kuti uibate. Ikiyinure, manheru ano, haungadaro here? Apo achiuya pakati pedu, Mukundi uya ane maSimba akakunda hosha dzose, uye ndokuuya pano kuzokuratidzai kuti Akazviita, nokuti Achiri Shoko. "Uye Shoko ndiro munzveri wemifungo iri mumwoyo."

<sup>95</sup> Kadhi rekunamatirwa ripi? B, poshi kusvika... Takatangira kubva papi, pane humwe husiku? [Mumwe munhu anoti, "Poshi."—Mupepeti] Ngatitangirei pana makumi mashanu. Ndiani ane kadhi rekunamatirwa B, makumi mashanu? Simudza ruoko rwako. Kadhi rekunamatirwa B. Takatangira pana poshi,

humwe husiku, zvino tichatangira pana makumi mashanu, manheru ano.

<sup>96</sup> Ndiani ane B, B, makumi mashanu? Simudza ruoko rwako. Kadhi rekunamatirwa B, makumi mashanu. Munoreva kuti harisi pano? Munaro here? Zvakanaka, B, makumi mashanu. B, makumi mashanu nerimwe, ndiani anaro? B, makumi mashanu nerimwe, zvakanaka. B, makumi mashanu nembiri, ndiani ane B, makumi mashanu nembiri? Zvakanaka, munaro. B, makumi mashanu nenhatus, makumi mashanu neina, huyai neche kuno chaiko. Makumi mashanu neina, makumi mashanu neshanu.

<sup>97</sup> Mukomana wangu anouya zasi kuno, ndisati ndatombopinda, ovhenganisa chitsama chemakadhi. Uye onai zvaanenge ari, rimwe *apa* uye rimwe *apo*? Havavize. Unogona kudzika nemutsara *uyu* pano wowana poshi, anotevera owana gumi, mumwezve wowana makumi maviri neshanu. Hativive kuti riri papi, asi, chero paanenge ari.

<sup>98</sup> Zvino mangani atadana? Mashanu, mana? B, makumi mashanu. Ranga riri B, makumi mashanu, handiro here? [Mumwe munhu anoti, “Hongu.”—Mupepeti] B, makumi mashanu kusvika makumi mashanu neshanu. Makumi mashanu nenhantus, makumi mashanu nenomwe, makumi mashanu nesere, makumi mashanu nepfumbamwe, makumi matanhatus. Zvino ngationei, poshi, piri... Averenge, Billy, uye ticha... Makumi matanhatus, makumi manomwe, ngavatange vasimuka, kana uchikwanisa. B, makumi mashanu kusvika makumi manomwe, makumi manomwe neshanu. Vaverengei, Hama Roy, kana muchikwanisa, pandiri kutaura neungano.

<sup>99</sup> Vangani vari kunze uko zvino apo makatarisa kuno, uye hamuna kadhi rekunamatirwa?

<sup>100</sup> Rangarirai, Jesu akati, “Mabasa aNdinoita muchaaitawo.” Ichokwadi here? Ichokwadi. Munozvitenda here? Mbeu yaAbrahama yakataura kudaro.

<sup>101</sup> Bhaibheri rinotaura, kuti, “Ndiye Muprisita Mukuru.” VaHebheru, chitsauko 4, “Ndiye Muprisita Mukuru anogona kubatwa nemanzwiro ehutera hwedu.” Munozvitenda here? Kana Ari mumwe chete zuro, nhasi, nekusingaperi, Aizozviita sei?

<sup>102</sup> Paiva nemumwe mukadzi mudiki, muBhaibheri, muchicherechedza zvandiri kutaura. Mudzimai mudiki, muBhaibheri, zvichida akange asina kadhi rekunamatirwa; asi akati mumoyo make, “Kana ndikakwanisa kubata Murume iyeye, ndinoMutenda.” Akanga apedza zvose zvaiva nazvo, kwachire...navanachiremba. Havana kugona kumubatsira. Nyaya yake yakanga yakakura kwazvo. Havana kugona kumubatsira. Asi akatenda kuti Mwari vaizomubatsira. Zvino akabata mupendero waKe, wenguwo yaKe.

<sup>103</sup> Iye ndokuti, “Ndinoona kuti simba rabva maNdiri.” Ndizvo here?

<sup>104</sup> Munotenda here kuti ndiYe mumwe chete, manheru ano? Munotenda here kuti Ari pano? Vangani vanotenda kuti Akamuka kubva kuvakafa? Zvino ungaratidza sei kuti Akamuka kubva kuvakafa?

<sup>105</sup> Kasiri kare, mumwe murume muBaptisti ane mukurumbira akauya kwandiri, uye akati, “Hama Branham, ndakakundwa—kundwa, imwe nguva, nemuMohamedhi akataura izvozvo. Akati, ‘Kana Akamuka, Akavimbisa kuti Aizoita zvime chetezvo. NgatiMuonei achizviita.’” Munoonaa, vanotenda kuti haAna kuzviita.

<sup>106</sup> Asi tinotenda kuti Anozviita. Tinotenda kuti Akamuka kubva kuvakafa. Hapana chimwe chitendero pasi pano chinogona kuratidza kuti muvambi wavo mupenu, kunze kweChikristu. Uye nzira bedzi Mwari yavanogona kuZvisimbisa nayo, kuburikidza neavo vanozvitenda; nekuti ndiyo nzira bedzi Mwari yavanoita nayo Mashoko aVo, ndeavo vanoRitenda.

<sup>107</sup> Zvino apo vari kugadzirisa mutsara mudiki wekunamatirwa uyu pano, handizivi kuti tichawana vangani, ndinoda kuti mumwe nemumwe wenyu, abate zvimbo yake, gara pachigaro chako, musafambe-fambe, tarisa kuno wonyengetera, uchiti, “Ishe Jesu, ndinotenda.”

<sup>108</sup> Munorangarira, Akandiudza, “Kana ukaita kuti vanhu vakutende; zvino iwe woperera paunonamata.” Zvafamba nemunyika ino yose, kuenda nekudzoka, kwemakore gumi nemashanu, hapana kana nguva imwe zvayo yazvakakundika. Hazvikwanise kukundikana.

<sup>109</sup> Mwari, chinhu choga chisingagonekwe naMwari, ndiko kukundikana. Vanofanira kuchengeta Shoko raVo. Ndinozvitenda izvozvo. Ndinozvitenda izvozvo zvakangofanana nezvandi... kupfuura zvandinotenda kuti ndakamira pano, kupfuura zvandinotenda kuti ndiri muchivakwa chino; izvi zvinogona kunge zviri hwerazuva, kunogona kunge kuri kurota. Mumweya mangu, ndinoziva kuti Jesu Kristu Mwanakomana waMwari anorarama. Uye iwe uri Mbeu yaAbrahama, iwe uri wakafa muna Kristu, uri Mbeu yaAbrahama.

<sup>110</sup> Zvino vane mamwe mahengechepfu pano. Kubudirira kukuru kunoitwa neaya, vanhu vanotenda. Zvino ngatikotamisei misoro yedu, pavanenge vachigadzirira, uye tonamatira aya.

<sup>111</sup> Baba veKudenga, tinodzidziswa muBhaibheri, uye pane vanhu pano vanotenda Shoko rose raMakataura kuti iChokwadi. Ishe, dzimwe nguva vanodzedzereka uye vanobaya-baya paburi rekiyi, nekiyi, vachiripotsa, nekumaranzura, asi vanotenda kuti riripo. Ingovaregai varambe vachibaya-baya, vachariwana, nekuti riripo. Uye kiyi iyoyo ndiyo kiyi yacho chaiyo, “Kana

uchigona kutenda, zvinhu zvose zvinogoneka.” Apo rwiyo rwuchiimbwa zvino, kana kuridzwa.

<sup>112</sup> MuBhaibheri rinotaura kuti, “Pauro akatora kubva pamuviri wake mahengechepfu nemaapuroni, ndokuzvitumira kuvarwere nevanotambudzwa, uye mweya yetsvina ikasiya vanhu, ivo vakapodzwa.”

<sup>113</sup> Zvino, Ishe, tinoziva kuti Mutsvene Pauro aneMi. Asi, akanga asiri iye; maiva iMi, Ishe, Kristu maari. “Handisi ini ndinorarama, asi Kristu anorarama mandiri,” akadaro.

<sup>114</sup> Uye zvino kuchizvarwa chino, Muchiri Kristu, nhasi, sezvamakanga muri nezuro. Uye pandinonamatira mahengechepfu aya, ndakaabata, ndinonamatira kuti Mugokunda muvengi wese. Vapei kutenda, kunovaita kuti vazine kuti muvengi akundwa.

<sup>115</sup> Uye imwe nguva, Gungwa Dzvuku, sezvatangobva kutaura nezvaro, rakavharira Israeri kubva kuvimbiso, uye vakanga vari mugwara rebasa. Zvino mumwe munyori akatura, kuti, “Mwari vakatarisa pasi nemaziso ane hasha, kubudikidza nemuShongwe yeMoto, zvino gungwa rakatya uye rikavhura masuwo aro, ivo ndokuyambukira mhiri.”

<sup>116</sup> Tarisai zasi, manheru ano, kubudikidza nemuRopa raJesu Kristu. Uye dai, mahengechepfu aya paanoiswa pamusoro pevanorwara, dai muvengi aona kutenda kwedu, manheru ano, patiri kuvanamatira munamato uyu wekutenda. Uye dai mumwe nemumwe adzikingurwa, nemuZita raJesu Kristu. Ameni.

<sup>117</sup> Ikozvino ndinoda kuteerera kwenyu kuzere. Hameno ari pamaiki iri kumusoro kuno, unogona kuiwedzera zvishoma. Nekuti, kana Mweya Mutsvene achifanira kuita izvi... Handitauri kuti Achazviita.

<sup>118</sup> Zvino chero munhu anouya pano uye okuudzai kuti ane simba rekupodza vanorwara, musazvitenda. Simba rose riri muna Kristu. Ndiye Mukundi, kwete iwe nenii. Tinongogamuchira zvaAkaita. Hapana munhu ane simba rekuponesa kana rokupodza.

<sup>119</sup> Munhu wese ari munyika, mutengo wakatobhadharwa kare. Chinodiwa chacho chakabhadharwa. Chakabhadharwa sei? “Akakuvadzwa nekuda kwekudarika kwedu, nemavanga aKe takatopodzwa.” Kupodzwa kwako—kwako kwabhadharwa. Ruponeso rwako rwakabhadharwa. Une kutenda here kwekuuya, kuzozvigamuchira? Ndizvo zvoga. Kana uri Mbeu yaAbrahama, unako. Mwari vakakuvimbisa. Pane chinhu chiri mauri chinoti kuripo, uye kuripo.

<sup>120</sup> Zvino chipo chii? Chipo kuenda here kunze uchinopodza vanhu? Kwete. Chipo kuzvibvisa munzira pachako, kuti Mwari vagone kukushandisa.

<sup>121</sup> Zvino Vakavimbisa ichocco, chiratidzo chekupedzisira, maringe naJesu Kristu, "Sezvazvaiva mumazuva eSodhoma, risati ratsva." Kwete zvime zvinhu zvisati zvaitika, Evhangeri yakaparidzwa naRoti, nevamwe vakadaro; kwete izvozvo. Asi nguva pfupi risati rapiswa, Mwari vakaburuka vari muchimiro chemunhu, ndokugara neChechi yakasanangurwa, Abrahama neboka rake, vaiva nevimbiso.

<sup>122</sup> Zvino rangarirai, Mbeu yaAbrahama chete ndiyo inogamuchira izvi. "Kwechinguvana uye nyika haichazoNdionizive," Jesu akadaro. "Imi muchaNdiona, nokuti Ndichava nemi, mamuri, kusvikira kumagumo enyika."

<sup>123</sup> Asi Akavimbisa, nguva pfupi Asati adzoka zvakare, "Sezvazvakanga zviri muSodhoma," tarisai izvo Sodhoma iri kuwana; tarisai izvo Chechi yakasanangurwa iri kuwana, akati, "ndizvo zvazvichava pakuuya kweMwanakomana wemunhu." Mwari vachiratidza muchimiro chemunhu, kuti vaine musana waVo wakafuratira kutende, vakataura zvakaitwa naSara mukati metende. Munhu wose anoziva kuti iChokwadi, simudzai maoko enyu. Ndizvo chaizvo. Zvino Vakazvivimbisa. Tave panguva yekuguma. Zvino rangarirai, ndicho chinhu chekupedzisira chakaitika; uye nyika yeMarudzi yakapiswa, Sodhoma, uye mwanakomana wevimbiso ndokuuya panzvimbio. Tiri kutarisira Mwanakomana akavimbisa, Mwanakomana waMwari.

<sup>124</sup> Hepano patiri. Dai Mwari vakasvinudza meso enyu. Handina chimwezve chandinoziva chekutaura. Dai Vasvinudza meso enyu.

<sup>125</sup> Zvino Baba veKudenga, handitokwanisiwo, ndiri dutu revhu raMakaumba pamwe chete, mukaisa pano. O Mwari, dai ini, manheru ano, ndawana nyasha neHupo hweNyu, kuti zvigova kuti iMi muzoshandisa tumirwi utwu twevhru twaMuinatwo imo muno. Kuti avo, Ishe, vaMakadana kuHupenyu Husingaperi, uye pamwe havasati vaHugamuchira nazvino, dai vaona vimbiso idzi. Vanogona kunge vakadzidziswa kuti izvozvo zvaive zverimwe zuva, asi hezvinoi izvi zvirimo muBhaibheri. Zvisimbisei, Ishe. Ndiyo dudziro yeNyu pacheNyu. Hazvidi zvinopfuura izvozvo. Kana Mukaita kuti zvidaro, zvino vanobva vaona kuti Shoko nderechokwadi. Zviitei, Baba. Tinozvikumikidza kwaMuri.

<sup>126</sup> Regai munhu wose ari muno, Ishe, ashandise kutenda kwake, manheru ano. Dai nhengo yese yeRudzi rwaAbrahama, kubudikidza naJesu Kristu, yava nekutenda, manheru ano, uye yogamuchira Hupo hweNyu. Zvino tichaKupai rumbidzo. Ameni.

<sup>127</sup> Zvino, iyi ndiyo-...Zvino izvi zvinoshamisa. Ndinoda kuti mundibatsire zvino, ndinyengeterereiwo. Garai

makanyatsonyarara, musafamba-famba. Rambai makagara, munamate.

<sup>128</sup> Zvino, munoona, zvave kushanduka zvichibva pakuvhangera, kuenda pakuzvizorodza nenzira yekuti Mweya waMwari ugokwanisa kukutora zvizere mune chimwe chiyero.

<sup>129</sup> Zvino hepano pamire mudiki uyu... Huyai neche pano zvishoma, amai. Uye bedzi... Zvakana, kuti ndisazobva pane maiki iyi. Munoona, handizivi zvinoitika, munoona, uyezve dzimwe nguva, munoziva... Zvino nzira chete yandinozviviza nayo, zviri—zviri pamaiki, munoona, uye vari kuedza kuzvibata kunze uko, uye ini handizivi kuti chii.

<sup>130</sup> Zvino tiri vatorwa mumwe kune nemumwe. Handikuzivei, handina kumbokuonai muhupenyu hwangu. Asi muri mudiki kwazvo kwandiri. Uye tinogona kunge takazvarwa mamaira ari kure nekure, uye takasiyana nemakore akati kuti. Aka ndekekutanga kedu kusangana. Ndizvo here? Kana zvirizvo, simudzai ruoko rwenyu kuti ungano ione. Zvino, angori mudzimai akamira pano.

<sup>131</sup> Tarisai, zvidzoserei kuMagwaro. Ngatitorei Mutsvene Johane 4. Mumwe nemumwe wenyu muiverenge kana maenda kumba. Kwete—kwete kuti mudzimai uyu imhando iyoyo yemukadzi; handizive. Uye imi munozviviza kuti handisi Jesu Kristu. Asi iYe ari pano. NdiYe. Zvino Mweya waKe wakatizodza, unogona kuzarura dambudzikoro rake, sezvaAkaita kumukadzi patsime. Zvimwe chetezvo.

<sup>132</sup> Zvino, nokuda kwazvo, apo vaprisita nevakuru vezuva iroro, vakati, “Murume uyu muuki, kana kuti dhimoni, Bherizebhabhu.”

<sup>133</sup> Mukadzi uyu akati, “Changamire, ndinoona kuti Muri muporofita. Tinoziva kuti Mesia ari kuuya, uye ndicho chichava chiratidzo chaKe.”

<sup>134</sup> Zvino, vangani vanoziva kuti ichokwadi? Zvino, kana Ari mumwe chete zuro, nhasi, nekusingaperi, hachingava chiratidzo chaKe here manheru ano? Akavimbisa here kuti zvaizodaro, panguva shoma magumo enguva ave kusvika? Zvino onai kana Akachengeta vimbiso yaKe kuMbeu yaAbrahama.

<sup>135</sup> Zvino kana paine ani zvake ari muno anofunga kuti handizvo, huya kumusoro kuno ugoita zvimwe chetezvo. Kana zvisiri, saka usataure chinhu nezvazvo. Une mukana wacho.

<sup>136</sup> Zvino, muZita raKristu, ndinotora mwuya wose pasi pesimba rangu, kupa kubwinya nerumbidzo kuna Mwari.

<sup>137</sup> Ndichangotaura newe, kwechinguvana, mudzimai wechidiki. Munoziva, Ishe wedu akatura nemudzimai uya patsime. Akati, “Ndipewo mvura yekunwa.” Akanga Achiitei?

<sup>138</sup> Zvino tarisai, Akati, muna Mutsvene Johane 5, “Zvirokwazvo, zvirokwazvo, ndinoti kwamuri, Mwanakomana,”

aiva ari iYe, mutumbi, "hapana chandinogona kuita ini pachaNgu," izvo bedzi sezvaAkaona Baba vachiita. "Izvo zvinoitwa naBaba, Vanozviratidza Mwanakomana. Munoonaa, haNdigone kuita chinhua pachaNgu, asi sezvaNdinoona Baba vachichiita." Zvino, Jesu haana kumboita chishamiso chimwe chete kutozosvikira Mwari vatanga vaMuratidza nechiratidzo; kwete kuMuudza munzeve yaKe, asi kuMuratidza. "ZvaNdinoona," kwete kunzwa, "kuona Baba vachiita." Ndizvo zvakamuita Muporofita akafanana naMosesi, sezvakataurwa naMosesi. Zvino apo iYe—iYe akaziva Baba...Akanga ari pane...

<sup>139</sup> Akanga achienda kuJeriko, asi Aifanira kupfuura nekuSamaria, zvino Akasvika kuguta reSaika. Uye zvino munoona, vaSamaria vakanga vachitarisira Mesia.

<sup>140</sup> VaJudha vakanga vachichitarisira, uye Akavaratidza chiratidzo chaKe. Firipi, Natanieri, Petro, pakangoitwa chiratidzo ichocco, vakati, "Muri Mwanakomana waMwari."

Rabhi akati, "Murume yuu ndiBherizebhbabhu."

<sup>141</sup> Asi zvino rangerirai, veMarudzi, isu, taiva maAnglo-Saxon, isu—isu takanga tisiri kutarisira Mesia. Taive vahedheni, vaRoma, nevamwe vakadaro. Takanga tisina Mesia wataimbotarisira. Anouya chete kune avo vari kuMutarisira.

<sup>142</sup> Asi vaSamaria vakanga vachiMutarisira, saka Aitofanira kupfuura nekwavari, kumusoro kuSamaria. Akagara pasi patsime. Mumwe mudzimai wechidiki, zvichida angangoita zera renyu, ndokuuyako. Akanga ari mukadzi ane mbiri yakashata. Makaverenga nyaya yacho, ndodaira kudaro. Zvino Akati, "Mudzimai, Ndiunzirewo mvura yekunwa."

<sup>143</sup> Iye akati, "Oo, hakuna tsika yakadaro yekuti iMi, muJudha, mukumbire muSamaria chinhua chakadaro."

<sup>144</sup> Iye akati, "Asi dai waiziva kuti Ndiyani wauri kutaura naye, waizokumbira iNi mvura yekunwa."

<sup>145</sup> Nhaurirano ndokuenderera mberi. Pekupedzisira, Akawana paiva nedambudziko rake. Munorangarira kuti raiva rei? Aive nevarume vakawandisa. Uye akati, "Enda unotora murume wako, mouya pano."

Iye akati, "Handina kana."

<sup>146</sup> Akati, "Wataura zvakanaka," akati, "nekuti wakava nevashanu, zvakare uyo wauri kugara naye iko zvino haasi wako."

<sup>147</sup> Akati, "Changamire, ndinoona kuti Muri muporofita. Tinoziva kuti Mesia anouya, Achatiudza zvinhu izvi."

Zvino iYe ndokuti, "Ndini iYe."

<sup>148</sup> Akasiya chirongo chake, akamhanyira muguta, ndokuti, "Huyai, muone Murume Andiudza zvandakaita. Haasi iye here

Mesiya?" Vakanga vasina kumbova nemuporofita kwemazana emakore. Zvino heuno Murume aizviti ndiye Mesia, uye achiratidza kuva mu—muporofita, uye akaratidza chiratidzo chaMesia.

<sup>149</sup> Zvinokuitawo here kuti utende chinhu chimwe chetecho, kana Akaita chinhu chimwe chete, iYe zvaari mumwe chete zuro, nhasi, nekusingaperi, uye akavimbisa neMagwaro aya kuti Aizozviita?

Zvingaite here kuti ungano itende?

<sup>150</sup> Munotambudzwa nedambudziko reitsvo. Kana zviri izvo, simudzai ruoko rwenyu.

<sup>151</sup> Sei izvo zviri kungorovera kumeso kwangu? Mumwe munhu ari kuti, "Angoita zvekuzvifungidzira." Handina kumbozvifungidzira.

<sup>152</sup> Pano, mudzimai akanaka. Munonditenda here? Zvino munoziva kuti handina kumbozvifungidzira izvozvo. Regai nditaure chimwe chinhu futi. Murume wenyu anemi. Ari kutambudzwavo, zvakare. Haasi here? Chinhano chemuzongoza. Ndizvozvo. Handizvo here? Mune mukomana mudiki wamuinaye. Ari kutambudzikawo, zvakare. Muri kuda kuti anamatirwe. Ane chimwe chinhu chisina kumira zvakanaka nemaziso ake. Ndizvozvo chaizvo. Mune musikana mudiki wamuinaye, ane dambudziko reitsvo, semi. Ndizvo here? Zvino mese munogona kupora, kana mukatenda. Munozvitenda here? Mwari vakuropafadzei. Endai nenzira yenuy mugopora.

<sup>153</sup> Munotenda here? Ndiye mumwe chete zuro, nhasi, nekusingaperi. Chimbori chii? Chii chaAri kuedza kuita? Kwamuri, Mbeu yaAbrahama, Ari kukuratidzai kuti haAna kufa. Handigone kuita zvinhu izvozvo. HaAna kufa. Asi Mupenyu, achikuratidzai kuti mune kodzero yekutora masuwo emuvengi wenyu. Izvozvo zvinofanira kuzvipedza.

<sup>154</sup> Mudzimai yuu, huyai nechekuno, kwechinguvana. Tingange tiri, pazera rakada kufanana, ndinofunga kudaro. Asi tiri—tiri vatorwa mumwe kune mumwe, sekuziva kwangu. Handikuzivei, uye tiri vatorwa. Hapana chandinoziva pamusoro penyu. Kana zviri izvo, simudzai ruoko rwenyu, munoona. [Hanzvadzi inoti, "Ndizvozvo."—Mupepeti] Vamwe vavo vangokupai kadhi rokunamatirwa, zvino hezvoka muri pano. Zvakanaka. Zvino kana Ishe Jesu...

<sup>155</sup> Dai ini, pamwe, toti ndanga ndichiedza kutora nzvimbo yaHama Oral Roberts, kana vamwe vevarume vakuru ava vekutenda, ndaizoti, "Amai, dambudziko renyu nderei?"

<sup>156</sup> Maizoti, "Zvino, ndine zvakati-nezvokuti." Zvino, anogona kunge asiri mugwara. Maona? Handizive. Maona? Asi, iye, munogona kumuudza kuti dambudziko nderei.

<sup>157</sup> Aizoisa maoko pamusoro penyu, oti, “Mwari vakandituma ku—kuzonamatira vanorwara. Munozvitenda here izvozvo?” “Hongu.” “Mwari ngavarumbidzwe! Endai, muzvitende.”

<sup>158</sup> Zvakanaka. Zvakanaka. Mwari vakazvivimbisa izvozvo. Asi, munooona, tiri kurarama muzu—zuva riri kumberi zvishoma kupfuura izvozvo. Jesu akavimbisa, “Sezvazvaiva mumazuva eSodhoma. Mabasa aNdinoita nemiwo muchaaita.”

<sup>159</sup> Zvino kana Mwari vakakwanisa kundiudza zvamainge muri, munoziva kuti ichokwadi here kana kuti kwete. Vanogona kukuudzai zvamuchange muri. Uye kana ichocco chiri chokwadi, ichi chichavawo chokwadi, zvakare. Kana Vakakuudzai, chero chii hacho, ini handizive; asi kana Vakandiudza kuti dambudziko renyu nderei.

<sup>160</sup> Mungazvitendawo here, zvakare, unguano?

<sup>161</sup> Chaizvoizvo ndinofanira kumira. Kamwe chete ikako, munhu uya anga ari pano nguva yapfuura, zvinofanira kuzvisimbisa. Jesu akazviita kamwe chete. Haana kuzombozviitazve imwe nguva. Munhu wose muSaika akazvitenda, akatenda chapupu chemudzimai uyu, paakauya, akavaudza, zvino akanga ari mukadzi ane mbiri yakaipa. Mukristu achangobva papuratifomu, pamberi penyu mose! Ameni. Asi nekuda kwekuti nguva yapera kupfuura zvatinofunga, dai Ishe varamba vachiZviratidza, Mukundi mukuru, ane masimba, uyo Mbeu yaAbrahama... Asi saAbrahama, Akazviitira Abrahama, kamwe chete; ndokuparadza iya, ndokuzviita zvakare. Abrahama akaenderera mberi nekutenda Mwari.

<sup>162</sup> Hamusi pano nokuda kwenyu pachenyu. Muri pano nekuda kwemumwe munhu, uye mudzimai. Ndisisi venyu. Zvino mudzimai uyu ane mumvuri werufu. Uye ari kutambudzika nechi—chirwere cheshuga. Uye haasi wekuno. Anobva ku... Anobva kuLouisiana, nyika ine machakwi. Iyo... Uye hechino chimwe chinhu, kuti unguano izive izvi. Mune mwanasikana ari kurwara chaizvo, ari kuronga kuzouya kumusangano uno, uye ane pfari. Ichokwadi. Ichokwadi. Handizvo here? Munotenda here zvino? [Hanzvadzi inoti, “Hongu. Ameni.”—Mupepeti] Kana muri Mbeu yaAbrahama, zvigamuchirei mofamba muchibuda, uye mugopodzwa muZita raJesu Kristu.

<sup>163</sup> Munotenda here? Zvirokwazvo. Rangarirai, ivimbiso yaVo. Vakati Vaizozviita. Vanochengeta vimbiso yaVo.

<sup>164</sup> Makadiniko? Tiri vatorwa mumwe kune mumwe. Handikuzivei. Asi Mwari vanokuzivai. Munotenda here kana Mwari vakakwanisa kundiratidza dambudziko renyu, zvino munobva maziva kuti zvinofanira kubva kune rimwe simba remweya. Zvino, pane zvinhu zviviri bedzi kwazvinogona kubva kwazviri, zvaungafungidzira. Kana zvaitwa, zvinopfuirira kutsanangura, nekuti chiitiko chinoshamisa. Uye, zvakare,

inenji; chimwe chinhu, zvekare, hachinzwisisike, asi chiri chechokwadi. Chinozova nenji. Uye zvino munoziva, kana chiri chokwadi kana kuti kwete, muchaziva kuti Akuudzai chokwadi here.

<sup>165</sup> Zvino, rangarirai, handikuzivei. Anofanira kuva Mumwe Munhu asiri ini. Kana mukaita sevaFarise, zvino vakati, "Oo, mweya wetsvina," zvino munowana mubairo iwoyo. Kana muchitenda kuti ndiKristu, munowana mubairo waKe. Chikonzero muchikwanisa kuzvitenda, imhaka yekuti Akazvivimbisira zuva rino, uye hazvina kumboitika kubva panguva iyoyo kusvika zvino. Zvinoita nguva yekupedzisira.

<sup>166</sup> Pane mumwe munhu ari kuramba achioneka pamberi penyu, nguva yose. Murume, achenas musoro. Murume wenyu. Akagara apo chaipo. Ari kuedza kugamuchira kupodzwa kwake, aine mumvuri wekenza, bundu ritor, kenza. Mune dambudzikoreitsvo, dambudzikoredundira. Ndimi Baba naMai Little. Ndizvo here? [Hanzvadzi inoti, "Hongu."—Mupepeti] Tendai nemoyo wenyu wese, uye mugopodzwa.

<sup>167</sup> "Unoti ko zita rake, ravo?" Nhai, zvirokwazvo. Jesu haana kuudza here Petro kuti, "Zita rako ndiSimoni, mwanakomana waJonasi"?

<sup>168</sup> Heuno murume. Tiri vatorwa mumwe kune nemumwe, changamire. Handikuzivei. Asi muri murume, sa—saPetro achiuya kuna Ishe Jesu, tasangana. Munonditenda here kuva muranda waKe? Munotenda here kuti zvandataura ichokwadi? [Hama inoti, "Hongu, changamire. Ndinodaro, changamire."—Mupepeti] Kana muchigona kuzvitenda! Ini, kana paine chinhu chandinogona kukuitirai, ndaizochiita, asi hapana chandinogona kuita. Akatozviita kare; chingori chimwe chinhu chinokuitai kuti muzvitende. Uye, munoonas, haangambove ini. Dai aiva ini, ndai—ndaikuitirai zvese zvandaigona. Asi Akandipa chipo, uye ndinongozvizorodza pamberi paKe, uye iYe ndiye anotaura. Munozvitenda here? ["Hongu."]

<sup>169</sup> Munozvitenda here, ungano?

<sup>170</sup> Ndanga ndichida kuti ndiwane murume. Mune zvinhu zvakati wandezi zvisina kumira zvakakanaka pamuri. Asi chimwe chezvinhu zvacho ndechekuti, mune bundu paziso renyu rekurudyi. Ndiro dambudzikorenyu guru. Hechino chimwezve chinhu, pane mukadzi ari kuramba achioneka pano. Mudzimai wenyu. Munotenda here kuti Mwari vanogona kundiudza zviri kunetsa pamudzimai wenyu pano? Dambudzikorake riri mumuromo make. Mazino ake. Ndizvozvo chaizvo. Munotenda here kuti iyeye Jesu mumwe chete, Akaziva kuti Simoni Petro aiva ani, anogona kundiudza kuti ndimi ani? [Hama inoti, "Hongu."—Mupepeti] Zvingakuitai here kuti mutende zvikuru? ["Hongu, changamire."] Zvingadaro? ["Hongu."] Oscar Barnes.

[“Ndizvozvo.”] Ndizvo here? Endai munzira yenu kumba, mugopodzwa.

<sup>171</sup> [Chibenga chisina chinhu patepi—Mupepeti]... mutorwa kwamuri. Handikuziveyi, asi Mwari vanokuzivai. Munotenda here kuti Vanokwanisa kundiudza kuti dambudzikorenyu chii? Mungazvitenda here nemoyo wenyu wese? Dambudzikorenyu riri pahuro penyu, uye nemuchipfuva chenyu apa. Ku—kuora kwebvupa. Muri kuita zvimapundu, zvakada kudaro, uye nemapfundo mukati memapfupa. Ndizvozvo chaizvo. Hamusi wekuno. Muri mugu—guta rine minda yemiti yemaranjisi yakaripoteredza. Riri mumupata, richiva nemakomo kumashure kwaro. Pane hotera inonzi Antlers. KuSan Bernardino. Ndiko kwamunobva. Dzokerai henuy, Jesu Kristu vanokupodzai, kana mukazvitenda.

<sup>172</sup> Pane chinhu chimwe chete chinogona kupodza kenza, ndiMwari. Munotenda here kuti Vachakuporesai? [Hama inoti, “Chokwadi ndinotenda.”—Mupepeti] Zvitendei! Endai, uye dai Ishe Mwari vakupodzai zvizere.

<sup>173</sup> Munguva pfupi yapfuura manga muchinge-... kuhuta-huta kwakanyanyisa, makasuruwara zvemazvirokwazvo. Nekuda kwekuhuta-huta uku, mudumbu menuyava nechimwe chinhano. Hamugone kugaya chikafu chenyu; zvinochisimudza chichiuya mumuromo menuyava. Inyon’o izere mumuromo menuyava. Zuva rarereka, munobva maneta chaizvo nezvimwe zvese. Mune ronda mudumbu menuyava. Munotenda here kuti ndiJesu Kristu vanogona kukuudzai izvozvo? [Hanzvadzi inoti, “Hongu.”—Mupepeti] Endai munodya kudya kwenyu kwemanheru, zvino. Tendai nemoyo wenyu wese, Jesu Kristu anokupodzai.

<sup>174</sup> Makadini? Pane zvinhu zvakawanda zvisina kuita zvakanaka. Asi chimwe chezvinhu chamuri kutya, mucharemadzwa nearthritis. Asi munotenda here kuti Mwari vachakupodzai, vokuitisai zvakanaka kubva kwairi? [Hanzvadzi inoti, “Hongu.”—Mupepeti]

<sup>175</sup> Ishe Jesu, ndinonamata kuti Muzvipe kuhanzvadzi yangu. Vapei kuona kwavo. Bvisai dambudzikoremadzimai pavari, uye mupodze arthritis, muZita raJesu. Ameni.

<sup>176</sup> Endai zvino, muchitenda. Vachazviita, uye zvichaita zvakanaka. Musapokane, rambai muchifamba, uye mutendei nemoyo wenyu wese.

<sup>177</sup> Dambudzikoremoyo chinhu chakaipa kwazvo, asi Kristu anopodza moyo. Munozvitenda here? [Hanzvadzi inoti, “Hongu.”—Mupepeti] Endai, zvitendei, uye zvose zvichaitwa. Zvapera.

<sup>178</sup> Munotenda kuti muchange makaremara here? Kwete, handifungewo kudaro, nenivo. Pfungwa yangu, arthritis; mumvuri uyo apo, oo, ikenza. Munotenda kuti Achaipodza

here? [Hanzvadzi inoti, “Hongu, ndinotenda.”—Mupepeti] Endai henyu, zvitendei. Achakupodzai.

<sup>179</sup> Kwanga kuchikunetsai, kwombomira zvishoma, kuvharika mumoyo. Asi munotenda here kuti kuri kuzopera, manheru ano? Endai henyu, zvitendei, Jesu Kristu anokupodzai.

<sup>180</sup> Mange mune dambudzikko diki, kubva kudambudzikko remadzimai, kwenguva refu. Uye zvakare, muri, mune nguva yakaoma pakumuka mangwanani. Munoomarara, mitezo yenyu. Munotadza kufamba, kutozosvika ave masikati, panguva. Iarthritis. Endai, musapokana, hamuchazove nayo zvakare. Ingozvitendai, nemoyo wenyu wese.

<sup>181</sup> Mune zvinhu zvakati wandei, zviri kunetsa. Asi chinhu chimwe chete chiri kukunetsai zvakanyanya, muri kufunga zvakare nezvearthritis, inova iri iyo, iri kukuremadzai. Munotenda here kuti Vachakuitai kuti mufambe uye mugopora? [Hanzvadzi inoti, “Hongu, changamire.”—Mupepeti] Endai, zvitendei nemoyo wenyu wese, Jesu Kristu achakupodzai.

<sup>182</sup> Mwoyo unohuta-huta, nearthritis, asi munotenda here kuti Mwari vachakupodzai? Munodaro here? Endai, uye dai Ishe Jesu vakupodzai.

<sup>183</sup> Dumbu iroro zvechokwadi rakupai dambudzikko rakanyanya mumakore mashoma apfuura, harina here? Harichazodaro zvakare. Endai, muzvitende. Mwari vakuropafadzei. Podzwai.

<sup>184</sup> Munogonawo, zvakare, dumbu renyu rapora. Endai zvenyu, tendai nemoyo wenyu wese. Musapokane.

<sup>185</sup> Mune nguva yakaoma pakufema, asthma iyoyo yakare inonyatsokushaisai zvokuita, haidaro here? Munotenda here kuti zvichaitwa zvino? [Hama inoti, “Hongu.”—Mupepeti] Zvakakanaka, endai munozvitenda. Ameni.

<sup>186</sup> Hareruya! Munotenda nemoyo wenyu wese here?

<sup>187</sup> Mirai zvishoma. Hamusi kuona Chiedza icho here? Mudzimai mudiki wechitema akanditarisa, akagara zasi chaipo apa, ane bundu padivi rekuruboshwe rwake. Ane dambudzikko reitsvo, zyimwe zvakangovhiringika. Mange muine kutenda kwakawedzerwa. Hamufanirwe kunge muchizouya henyu kumusoro kuno. Zvatopera. Ingozvitendai. Ameni. Ivai nokutenda muna Mwari!

Munozvitenda here?

<sup>188</sup> Munotenda here, hanzvadzi, muchakunda dambudzikko iroro remuzongoza, mugere ipapo? Munotenda here kuti Vachakupodzai? Zvakakanaka. Musazvipokane bedzi, zvino munogona kuva nazvo kana mukangozvitenda.

<sup>189</sup> Murume akagara apa, akanditarisa, ane dambudzikko reprostate, achimuka husiku nezvimwe. Munotenda here, changamire? Zvichapera, zvino, kana muchizvitenda.

<sup>190</sup> Heuno murume wechitema agere neche apa, akanditarisa. Ari kutambudzika nepfari. Ari kutsvagawo zvakare rubhabhatidzo rweMweya Mutsvene. Simukai netsoka dzenyu, changamire, gamuchirai kupodzwa kwenyu. Dai Mwari vakupai rubhabhatidzo rweMweya Mutsvene. Ameni.

<sup>191</sup> Agere kune rimwe divi kubva kwamuri, pane mwana akagara neche apo, ane pfariwo zvakare, anoita sekungofenda-fenda, akagara kunze uko, kune rimwe divi. Munotenda here kuti Mwari vachapodza mwana, apo? Munotenda nemoyo wenyu wese here? Zvino Mwari vachapodza mwana wacho.

<sup>192</sup> Munotenda here, mumwe nemumwe wenyu? Ha—haAsi—haAsi zvechokwadi here Mbeu yeHumambo yaAbrahama? HaAsi Mukundi ane masimba here? Akavimbisa here kuti unogona kutora masuwo emuvengi?

<sup>193</sup> Vangani venyu vakasungwa, vanonzwa kumanikidza kwemuvengi? Simudzai maoko enyu, kuti munonzwa kumanikidza kwemuvengi, uye muri Mbeu yaAbrahama, simudzai maoko enyu sevizvi. Woti, “Hama Branham, ndiri kunetseka nekuhuta-huta.” Oo, pane vangangoita makumi masere kubva muzana venyu vanako. Woti, ini...Rangova gobvu zvino, ungano yese yave kutoita sekuchenuruka gore jena rakakura kwazvo, zvava kutopotsa zvandiita bofu, kunze uko kwamuri.

<sup>194</sup> Hamuoni here, kuti pano makumi maviri kana makumi matatu, zvichida, ehurwere, kana kupfuura, ipo pano papuratifomu uye nekunze muungano umo, kuti Mwari havakundikane? NdiJesu Kristu mumwe chete zuro, nhasi, nekusingaperi. Munozvitenda here? [Ungano inoti, “Ameni.”—Mupepeti] Zvino ko madii, Mbeu yose yaAbrahama, ko madii matora kiyi zvino? Mukundi mukuru, akakukundira iwe, ari pano. Aratidza kuti ari pano. MunoMutenda here?

<sup>195</sup> Zvino tora kiyi yako yekutenda, tambanudza maoko ako, uye woti, “Jesu Kristu, ndinotenda ndichiipta pakupodzwa kwangu, iko zvino.” Simuka netsoka dzako. Simudza maoko ako, kiyinura kutenda kwako zvino. “Ndinotenda, Ishe Jesu. Ndinotenda izvozvi.”

<sup>196</sup> Zvino isai maoko enyu pamusoro pemumwe nemumwe. Isa maoko enyu achienda kune mumwe nemumwe, imwe Mbeu yaAbrahama. Zvino iwe namatira munhu iyeye. Isa maoko ako pamusoro pavo. Jesu akati, “Zviratidzo izvi zvichatevera avo vanotenda. Kana vakaisa maoko avo pane vanorwara, vachapora.”

<sup>197</sup> Satani, wakundwa hondo. MuZita raJesu Kristu, buda muno, uye uregedze vanhu ava vaende, kuitira kuti Mwari varumbidzwe.



*TATEGURU ABRAHAM* SHO64-0207  
(The Patriarch Abraham)

Mharidzo iyi neHama William Marrion Branham, yakaparidza kwokutanga neChirungu Chishanu manheru, Kukadzi 7, 1964, paKern County Fairgrounds muBakersfield, California, U.S.A., yakazotorwa kubva patepi yakarhekedwana ndokuzodhindhwa muChirungu pasina chakamurwa. Kuturikirwa uku muchiShona kwakazodhindhwa nokugoverwa neve Voice Of God Recordings.

SHONA

©2022 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE  
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwapi papirinda yekumba kuti ushandise uri iwe pachako kana kugovera kunze, usingatengesi, semudziyo wekuparatzira Evhangeri yaJesu Kristu. Bhuku iri harigoni kutengeswa, kudhindhwapi akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa nevekuVoice Of God Recordings®.

Kuwana umwe umboo kana zvimbewo zviripo zvingawanikwa, tapota nyorerai:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)